

四明叢書

張宗祥



杲堂文續鈔卷四目

正朔辨

唯一周先生論議

書薛白于先生論議後

徵壽董母陳太夫人七十文啓

募爲董氏孤出穀疏

募建耕雲精舍疏

爲沈曰克募葬資小疏

書蓼莪篇後

書季布傳後

書屠長卿先生尺牘後

書余君房先生集後

題家藏豐考功帖後

題合肥先生詩卷後

種蓮說

三戒

胡卓人詩小序

贈錢穉廉序

題繭庵雜詠卷首

代張聘毛氏啓

爲水甥聘毛女啓

請象書和上住布金寺啓

息廬銘

閨室銘

硯銘

戒庵藏須銘

黃先生像贊

小像自贊

畫貓贊

畫石贊

募修明州七塔寺疏

修天王廟文

犀皮藝賦

呆堂文續鈔卷四

明甬上李鄴嗣撰

正朔辨

從來強臣外敵篡主社稷使故國正朔僻在一隅彼則儼然據其位焉議者遂曰此天命所歸苟人民有屬斯吾主也雖賢者未免持議若此嗟夫亦大不經矣夫天下譬若一家然主人有君義焉其羣臣則猶臧獲輩也爲主人者必居深室正堂上而坐使爲其僕者奔走執事於前此理之常也忽有大盜乘閭率其徒突登主人

之堂而據之主人力不能與爭竊避諸旁廡側舍之中然則爲其僕者將曰彼居吾主人之堂遂以主人稱之耶抑將求諸旁廡側舍中而仍名其故主耶斯二者人必有以處之矣彼謂故國正朔遙寄一方遂非吾主亦猶失所居之堂而遂不得稱爲主人也其可哉其可哉此諸葛丞相正議之作者亭先生綱目之書所以大有功於萬世也雖然人心日壞矣彼反面事讐者不第忘其故主且將佐鬪焉古銘曰盜憎主人爲人臣僕而至與盜同心斯義不及犬馬矣

唯一周先生諡議

竊聞人生而父名之歿而君諡之諡者所以章其行之迹而易以身後之名也故曰行出於己名生於人凡有成德可稱則必賜之諡至春秋以下乃有不諡於朝而諡於鄉者君子未嘗非之蓋後世朝廷未能堅持公議凡在高位者其身後間得美諡致以細行受大名至若潛德在下名未揚於朝歿而其鄉人思之相與追論德行易以私諡其於酌量名實品目至公每足垂信然則諡於朝固不若諡於鄉之足傳也近日山陰若水余先

生與吾鄉唯一周先生風節略同余先生歿而鄉人謚之曰節孝君子以爲宜今周先生卒學者尙稱其字號非禮也謹按謚法守節無屈並曰貞鮮言令終並曰靖先生宿著歲寒之操沈默善終於德行爲合宜謚曰貞靖先生嘗攷南史晉陶潛謚曰靖節齊阮孝緒謚曰文貞俱一時所私謚也史書傳之至今若以先生方之其合有四陶公令彭澤不爲督郵束帶阮處士避郡陽之駕鑿垣而逃先生亦爲粵令以執法忤鄉貴飄然解組其合一也陶公自永初以來不復肯仕阮處士當天監

初逾堅行遜先生自甲申而後亦斷跡人間其合二也
陶公數從方外游阮處士末年蔬食先生亦野衲空山
沒齒藜藿其合三也陶公喜著文章自娛阮處士撰錄
至百餘卷先生亦多著述傳於吾黨其合四也今先生
於兩公兼諡各採其一足以輝映古今從此鐫銘幽石
表德於豐碑並以此稱庶可不愧已擇日將告先生靈
几前敢以合詞敬布同里敬識

書薛白于先生諡議後

傳曰諡者行之迹號者功之表蓋朝廷制諡大行易以

大名細行易以細名法甚重也若歿而行不達於上則其友與門人得私諡之使能名與實副則亦得傳焉晉陶靖節先生亦私謚也陶公初名淵明永初以後始更名曰潛晉命旣改明德遂潛此先生善自易其名也然則公庚申後八年俱其自挽之年矣蛟川薛白于先生靖節之儔也向與先公交數枉臨先公嘗謂胤曰此薛大司馬令嗣有文名其爲人馴孝無比最長者胤時心誌之及歲戊子僕被繫蛟川時從銀鐺中側聞先生無恙且城居以幅巾草屨坐臥一室人莫得望其顏色靖

節誄曰在艱不失其寡處言每見其默先生亦有焉先生年逾八十自剋死日怡然而終家人具斂體髮俱得全蓋先生卒乙未與在丙戌同其同里范子兆芝爲敘先生遺行擬謚曰孝定以質於僕僕接謚法大庸行節曰孝純行不爽曰定於先生德行為合方諸陶公則以孝視節以定視靖兩先生庶可比德焉獨是顏延之與陶公出處異轍祇以生平雅故因誄而謚之得附不朽今范子與薛先生居同里行同潔宜其知先生最深也當如所議謚曰孝定先生

徵壽董母陳太夫人七十文啓

吾友董異子故司農次公先生之子也歲巳酉董母陳太夫人年七十異子將乞四方之文爲太夫人壽以胤在猶子行使一言以先之余嘗與異子言近日文章家所不可者有二求人作壽言一不可也爲人作壽言二不可也余所見勢家子弟值其長耆生日必製爲綺屏繡帳列諸四壁每使友人操筆而擇有名位者冒之歷書其前後官階起落至五行下篆印大徑數寸以此耀鄉里耳目不問其文是否也或有好事者欲得四方

詩文徵言一出作者雲至未幾裒爲大集使錄諸別紙傳人几席之間未有讀至紙盡者卽吾有醬瓿亦當取善紙覆之設有慕其名位而存之是必茫不知古文詞者也而凡爲人操筆其索文者必先取其草去但簡句字中有稍近不祥者輒請改定至所壽者生平行歷或偶失一事上自其始祖至大父父下及子孫昆從內外姻戚或遺所應敘一人俱請補入如遇賣菜傭不請益不止往往索者出門輒手裂其草凡稍能自知者盡然設有慕其所壽者名位而存之是必極無廉恥者也夫

有所求而求其爲人所棄者有所作而作其所自棄者
卽徒廢人間之紙墨何也余故曰兩不可也若吾巽子
今日之請則不然巽子自其先司農後家亦稍稍落日
負米以事太夫人卽此日巽子奉觴爲壽亦不過少豐
於藜藿之常膳非有所誇耀也而巽子兩世所交俱海
內文章之伯使徵言所至其耆舊老先生見之必曰此
吾故人董先生之夫人也吾請觴一言其同時名下士
見之必曰此吾友董巽子之母也吾請觴一言是可徵
也徵其所可傳於世者也而巽子所與交前輩稱父執

及其所自執友必能以古道相益勉異子以菽水奉太夫人驩毋久作客漫游勸異子杜門益發司農公故篋續成所著書聲發金石豈有夸言諛詞伊優出紙上是可作也作其所可傳於世者也故胤敢以其說進於諸先生之前乞欣然賜教以壽董氏於世世卽胤之不文亦將載筆以從諸先生之後矣

募爲董氏孤出穀疏

余嘗論南朝諸公風格以蔡興宗爲第一興宗事寡嫂養孤兄子內行至謹在郢州見故人邱景先家累流離

經理使還及臨會稽爲何子平葬母高士朱百龍妻孔
辜孀餉以帳下米史家載其事不一夫興宗內行旣篤
復推而贍人之寡卹人之孤數行盛德事豈止其立朝
正色當爲第一流耶南史又稱青州劉善明值年飢出
所儲粟以散閭里人呼其家田爲續命田所謂續命者
言餓夫受仁者之粟以續絕氣譬猶乞之於斗極贖之
於司命也況以食米亡人而得堅苦節以食孤兒而得
延血脈之係此其絕續所關託命於仁人不更重耶吾
亡友梅庵先生有女甥董氏適於范年三十而寡所遺